

## 《摩醯首羅天法要》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 21, No. 1279

### No. 1279

#### 摩醯首羅天法要

爾時摩醯首羅天。於天上與諸天女遊戲化樂作諸伎樂。忽然於髮中化出一天女。容顏端正伎藝第一。諸天之眾無能過者。而說呪曰

曩謨鬱爾灑摩毘藥(二合)尸佉地毘也(二合)鉢囉(二合)鉢底(丁以反)野式伽羅者僧(去)林僧(去)林但儺也(二合)他濕嚩(二合)諾底兼跋囉麼諾哩儺吽泮吒(半音)

持誦此呪者。不問淨與不淨。有妻無妻。食五辛酒肉與不食。常誦持者。一切善願悉得成就。況三業清淨人早成悉地。更有何疑。若有人日沒之時。誦此呪一百八反。即有效驗

次畫像法 先畫摩醯首羅天像。容顏奇特端正殊妙。從髮際化出一天女。端正第一垂妙瓔珞。兩手絡環釧。左手捧天花。與天王相視喜媚之容。右手向下捻裙之勢。於左膝上坐摩登伽天

次說手印相。二羽外相叉。左押右成縛。檀惠進力豎禪智申相合禪庾為請召。真言曰

唵尾路羅娑(上)柅跛羅摩哩馱拈瞋馱拈瞋馱拈頻馱尼頻馱拈娑嚩(二合)賀

若有人日日受持此印真言。供養摩醯首羅天者。種種得驗。亦每作是印呪。供養一切諸佛。諸佛生歡喜。兼療一切諸病有驗

若誦滿一千反。令婦人生歡喜。若誦二千反。令一切人生歡喜。若誦三千反。得非人愛樂。誦四千反。一切毘那多羅鬼皆歡喜。誦五千反。一切龍女生歡喜心。乃至誦一萬反。一切天龍藥叉五通神仙皆悉歡喜。若人欲見本身者。取燒死人。殘柴誦呪一百八反招之。即得見本身。又法若能降伏怨家者。取赤土畫其形。書其姓名。以左腳踏之。誦呪一百八反。不論遠近彼人自然來向所降伏。又法若欲令夫婦相愛。畫其形書姓名。准前法踏之。即相愛敬。又法若欲得國王大臣一切諸人敬愛者。准前法作之。若療鬼病者。取伽陀木。截作二十一段。呪二十一反。一呪一燒病差。若神病。取阿魏安悉香雄黃青木香苦練葉。各等分搗篩和水為丸。誦呪燒之病即差。若狐媚病。取雄黃安悉香芍藥獨頭菽犀角羝羊尿白馬懸蹄驢夜等。各分此八味為朱燒之。薰入鼻孔及塗身上。若欲成結界者。以水呪七反。散灑四方。隨意遠近如法成結界

#### 摩醯首羅天王法要

此法中摩醯首羅者東北伊舍那天也